

**JASMIN DUVNJAK**  
delegat u Domu naroda  
Parlamenta Federacije BiH

Bosna i Hercegovina  
Federacija Bosne i Hercegovine  
**PARLAMENT FEDERACIJE**  
SARAJEVO

B-4

Priljeno: 30-07-2021			
Org. jed.	Broj	Priloga	Vrijednost
02	-02-	1654	21

**PARLAMENT FEDERACIJE BiH**  
**DOM NARODA**  
*n/r Tomislav Martinović, predsjedavajući*


**PREDMET: Prijedlog Zakona o dopuni Zakona o prostornom planiranju i korištenju zemljišta na nivou Federacije BiH – skraćeni postupak**

Poštovani,

Na osnovu člana 172. a u vezi sa članom 164. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), dostavljam Vam, radi razmatranja i usvajanja po skraćenom postupku Prijedlog Zakona o dopuni Zakona o prostornom planiranju i korištenju zemljišta na nivou Federacije BiH – skraćeni postupak („Sl. Novine FBiH“ br; 2/06, 72/07, 32/08, 4/10, 13/10 i 45/10).

**DELEGAT**

**JASMIN DUVNJAK**



# ZAKON O DOPUNI ZAKONA O PROSTORNOM PLANIRANJU I KORIŠTENJU ZEMLJIŠTA NA NIVOU FEDERACIJE

## Član 1.

U Zakonu o prostornom planiranju i korištenju zemljišta na nivou Federacije BiH ("Sl. novine Federacije BiH" br; 2/06, 72/07, 32/08, 4/10, 13/10 i 45/10) u članu 30. stav 1. iza riječi: „oblasti“ dodaju se riječi: „regionalnog i prostornog planiranja“.

U članu 30. stav 1. Zakona nakon riječi „saobraćaja“ dodaju se riječi: „hortikulture i pejzažne arhitekture“.

## Član 2.

Ovaj Zakon stupa na snagu narednog dana od dana objave u „Službenim novinama Federacije BiH“.

## I – USTAVNI OSNOV

Ustavni osnov za donošenje ovog zakona sadržan je u članu III.1.tačka d), Ustava Federacije Bosne i Hercegovine, prema kojem je u isključivoj nadležnosti Federacije utvrđivanje ekonomske politike, uključujući planiranje i obnovu i politiku korištenja zemljišta na federalnom nivou.

## II – RAZLOZI ZA DONOŠENJE

Postojećim zakonskim rješenjem nije regulirano pitanje polaganja stručnog ispita za bakalaureate regionalnog i prostornog planiranja koji su svoja stručna zvanja i zanimanja sticu na Prirodno-matematičkom fakultetu Univerziteta u Sarajevu u skladu sa studijskom programu iz prostornog planiranja koji je zapocet od 2005. godine na osnovu verificiranih nastavnih planova i programa.

Ovim prijedlogom dopune zakona bilo bi omogućeno polaganje stručnog ispita za bakalaureate regionalnog i prostornog planiranja, sto bi dovelo do izjednacavanja prava navedenih kandidata sa ostalim kandidatima iz drugih struka preciznije definiranih u zakonu, a istovremeno bi oblast planiranja podigli na jedan viši nivo.

### Po važećem Zakonu

U članu 30. Zakona stoji: „Stručnjaci iz oblasti urbanizma, arhitekture, građevinarstva, mašinstva, elektrotehnike i saobraćaja, koji obavljaju stručne poslove planiranja prostora i građenja, moraju imati položen stručni ispit. Provedbenim propisom federalnog ministra prostornog uređenja i okoliša (u daljnjem tekstu: federalni ministar) utvrdit će se uvjeti, način polaganja i program stručnog ispita.

Izuzetno od stava 1. ovog člana, od polaganja stručnog ispita oslobađaju se doktori nauka i magistri u oblasti planiranja prostora i građenja i lica koja imaju položen stručni ispit na teritoriji Bosne i Hercegovine.

Komisiju za polaganje stručnih ispita imenuje federalni ministar.

Aktom o imenovanju komisije određuje se broj članova, vrijeme na koje se komisija imenuje i način finansiranja rada komisije.“

Sa dopunom član 30. Zakona glasi: „Stručnjaci iz oblasti urbanizma, arhitekture, građevinarstva, mašinstva, elektrotehnike, saobraćaja, hortikulture i pejzažne arhitekture koji obavljaju stručne poslove planiranja prostora i građenja, moraju imati položen stručni ispit. Provedbenim propisom federalnog ministra prostornog uređenja i okoliša (u daljnjem tekstu: federalni ministar) utvrdit će se uvjeti, način polaganja i program stručnog ispita.

Izuzetno od stava 1. ovog člana, od polaganja stručnog ispita oslobađaju se doktori nauka i magistri u oblasti planiranja prostora i građenja i lica koja imaju položen stručni ispit na teritoriji Bosne i Hercegovine.

Komisiju za polaganje stručnih ispita imenuje federalni ministar.

Aktom o imenovanju komisije određuje se broj članova, vrijeme na koje se komisija imenuje i način finansiranja rada komisije.

Prijedlog za izmjenu se podnosi s ciljem regulisanja statusa stručnih lica iz oblasti hortikulture i pejzažne arhitekture. Uvidom u Zakon o prostornom planiranju i korištenju zemljišta na nivou Federacije BiH («Službene novine Federacije BiH», broj 2/06) vezano za član 30. stav 1., te Pravilnik o polaganju stručnih ispita iz oblasti arhitekture, građevinarstva, elektrotehnike, mašinstva i saobraćaja ("Službene novine Federacije BiH", br: 41/18) ustanovljeno je da nije definisan i određen stručni ispit za lica koja obavljaju poslove projektovanja, građenja i nadzora iz oblasti hortikulture i pejzažne arhitekture. Shodno tome nije jasno da li stručnjaci pomenutih profila imaju mogućnost samostalnog stručnog djelovanja. S obzirom da se lica koja mogu obavljati poslove iz člana 36. stav 1. tačka 5. i člana 49. stav 1. tačka 3., stiču zvanja na fakultetima iz oblasti biotehničkih nauka u Federaciji Bosne i Hercegovine na studijskim programima iz hortikulture i pejzažne arhitekture, molimo vas za uvrštavanje obaveze polaganja stručnog ispita iz oblasti hortikulture i pejzažne arhitekture. Za učešće ili samostalni angažman u pojedinim dijelovima projekata, nužno je posjedovanje sertifikata o položenom stručnom ispitu, te ovisno o zahtjevima projekta licence za projektovanje. Poslove u ovim oblastima prema tome obavljaju stručnjaci drugih oblasti, a stručna lica – inženjeri hortikulture i pejzažne struke – imaju ograničenu mogućnost djelovanja, ostvarenja stručnog djelovanja i marginalizovani su u stručnom i privrednom smislu.

U okviru aktivnosti Privredne komore FBiH je formirana Inženjerska komora FBiH te strukovna Matična sekcija inženjera hortikulture i pejzažne struke. Imajući u vidu kontinuiran rad institucija FBiH na adaptaciji pravila i principa EU legislativa u oblasti prostornog uređenja, ističemo da je potreba za prepoznavanjem hortikulture i pejzažne struke prepoznata i od Europske komisije. Europska komisija vezano za implementaciju Europske konvencije o pejzažu (BiH je potpisnica ove konvencije) je usvojila „Izveštaj o profesionalnom priznavanju

stručnjaka u oblasti pejzažne arhitekture“ u kome se među prvim zaključcima ističe formalno prepoznavanje pejzažne arhitekture kao struke među EU članicama (CEP-CDCPP (2019) 6E rev).

Znajući važnost regionalnog povezivanja napominjemo da susjedne zemlje Republika Hrvatska i Republika Srbija prepoznaju oblast hortikulture i pejzažne arhitekture.

- U Republici Hrvatskoj prema pravilniku o stručnom ispitu (NN 129/2015) Krajobrazni arhitekt polaže stručni ispit za područje arhitekture – Poslovi sudionika u gradnji krajobrazne arhitekture – magistar inženjer krajobrazne arhitekture s najmanje 300 ECTS bodova.
- U Republici Srbiji stručni ispit polažu lica za stečeno znanje u odgovarajućoj stručnoj oblasti s najmanje 300 ECTS bodova u skladu sa datim pravilnikom (SG RS br. 51/2019 od 19.7.2019.).
- U Republici Srpskoj u BiH prema Pravilniku o uslovima i načinu polaganja stručnog ispita (Sl. glasniku RS, br. 69 od 14. avgusta 2013) u članu 1. nije predviđen stručni ispit odvojeno za oblast hortikulture i pejzažne arhitekture. Međutim, pravilnik o licencama prepoznaje zanimanje pejzažnog arhitekta.

Inženjeri i masteri pejzažne i hortikulture struke se obrazuju na studijskim programima hortikulture i pejzažne arhitekture na javnim fakultetima u FBiH kao što su Šumarski fakultet (osnovni Hortikultura (osnovan 1997. godine) + master studij (Pejzažna arhitektura osnovan 2009. godine) i Poljoprivredno-prehrambeni fakultet (master studij Floristika i pejzažno oblikovanje osnovan 2010. godine) UNSA.

Pod hortikulturom se misli na oblast uzgoja zelenila i dizajna zelenih površina, a pod pejzažnom arhitekturom na oblast projektovanja zelenih površina. Za učešće ili samostalni angažman u pojedinim dijelovima projekata planiranja i građenja, nužno je posjedovanje uvjerenja o položenom stručnom ispitu, te ovisno o zahtjevima projekta licence za projektovanje i građenje. Poslove u ovim oblastima prema tome obavljaju stručnjaci drugih oblasti, a stručna lica hortikulture i pejzažne struke imaju ograničenu mogućnost djelovanja i marginalizovani su u stručnom i privrednom smislu.

## OBRAZLOŽENJE PREDLOŽENOG PRAVNOG RJEŠENJA

**Član 1.** Ovim članom se dopunjava stav 1. Člana 30. važećeg Zakona koji definiše stručnjake koji obavljaju stručne poslove planiranja prostora i građenja koji moraju imati položen stručni ispit.

**Član 2.** Ovim članom se određuje stupanje na snagu ovog zakona.

## FINANSIJSKA SREDSTVA

Za provođenje ovog Zakona nije potrebno osigurati dodatna sredstva u Budžetu Federacije Bosne i Hercegovine.